

ARLeF e Comitât 482: chês de Cjarte europeane e à di jessi une ratifiche “buine”

In audizion in Senât e intun incuintri cul viceministri Bubbico e je stade ilustrade la posizion condividue tra ARLeF e associazionisim sedi su la convenzion dal Consei di Europe che su la atuazion de normative di tutele

Lu àn spiegât a Udin al viceministri Filippo Bubbico (cun deleghe aes minorancis linguisticis) e tornât a marcâ la di dopo, a Rome, dilunc di une audizion in Senât. Pe ARLeF e pal Comitât / Odbor / Komitaat / Comitato 482 (che al met dongje une trentine di realtâts associativis espression de comunitât furlane, slovene e gjermaniche dal Friûl Vignesie Julie) la ratifiche de “Cjarte europeane des lenghis regionâls o minoritariis” e à di jessi une “buine ratifiche”, ven a stâi previodi cundizions di tutele no inferiôrs a chês za previodudis des leçs statâls e regionâls in vore.

Dilunc di une audizion romane, li des Comissions Afârs istituzionâls e Afârs forescej dal Senât, i rapresentants di ARLeF e Comitât 482, a àn tornât a fâ la solecitazion urgente ae ratifiche de “Cjarte” presentant ancje cualchi osservazion di merit sui ûs publics de lenghe, scuele e media.

La posizion de Agenzie in rivuart ae ratifiche e jere stade ilustrade dal president de ARLeF, Lorenzo Fabbro, dilunc di un incuintri cun Bubbico, adun cu la presidente de Regjon, Debora Serracchiani, e cui assessôrs regionâi Gianni Torrenti e Loredana Panariti. Te ocasion, presints ancje i parlamentârs Carlo Pegorer e Tamara Blažina, il prefet di Udin, Provvidenza Delfina Raimondo, e rapresentants dal Consei regionâl e de Universitât dal Friûl, Fabbro al à frontât ancje altris cuistions in rivuart ae tutele de minorance linguistiche furlane, scomençant de necessitât di intervignî pe formazion e il ricognossiment professionâl dai insegnants di/in lenghe furlane cu la creazion di une classe di concors di pueste e de dibisugne di previodi, tal prossim Contrat di servizi tra il Ministeri des Comunicazions e la Rai, une programazion radiotelevisive juste in lenghe furlane.

Bubbico al à ancje cjàpât sù il pont di viste dal Comitât 482, rapresentât di Carlo Puppo, che tal so intervent al à marcât cemût che lis cuistion frontadis di Fabbro e condivudis ancje di Serracchiani, Panariti e Torrenti, a sedin in sintonie cu lis istancis presentadis dal associazionisim, e si è fermât sui fonts pe aplicazion de leç statâl 482/99, sul tornâju a



meti ai nivei originâi e distribuîju cun plui ecuitât. Il Comitât 482, cun di plui, al à stiçât il rapresentant dal Esecutîf su la cuistion des cjartis di identitât bilengâls. Di fat, al coventarès slargiâ il servizi za previodût pai citadins di lenghe francese de Val di Aoste, di lenghe slovene dal Friûl Vignesie Julie, di lenghe todesce e ladine dal Trentin-Sud Tirôl ancje a chês altris comunitâts minorizadis ricognossudis, massime ai furlans e ai gjermanofons dal Friûl che, cun dut che a son stadis za fatis iniziativis tal passât, fin cumò

no àn ancjemò vût rispueste a cheste domande. «O vin tirât fûr cuistions tant impuartantis che concretis - al è stât il coment dal president de ARLeF, Lorenzo Fabbro - che propit par chest a son stadis condivudis sedi cu la Regjon che cul associazionisim. O sperin che sedi pe ratifiche de “Cjarte” che pe scuele, formazion e servizi public radiotelevisîf lis nestrîs osservazions a vedin la atenzion necessarie, cun risultâts sostanzîi». De stesse opinion ancje Silvana Schiavi Fachin dal Comitât 482.

La atore e cjantante televisive furlane e à realizât un video promoziônâl

Lodovica Comello, stele de serie “Violetta” argentine, testimonial di ecezion dal progjet Fûrxfur

Al è stât un video inedit di Lodovica Comello a vierzi il prin event public dal progjet FûrxFur, finanziât de ARLeF e realizât de Cooperative Informazion Furlane di Udin, vinars ai 8 di Mai, dentri dal cartelon siôr de rassegne “Vicino/lontano”. La atore e cjantante televisive furlane, stele de telenovela argentine “Violetta”, e à acetât di fâ di testimonial al progjet FûrxFur realizant un video promoziônâl di cualchi secont te sò lenghe mari, il furlan: «O soi simpri ator pal mont cu la mê musiche, ma us parial che o stedi fevelant par inglês?».

«Il progjet FûrxFur - al spieghel il president de Agenzie regionâl, Lorenzo Fabbro - al è stât ideât par promovî e veicolâ l'ûs de lenghe furlane tant che strument di comunicazion normâl in manifestazions e events di caratar trasversâl, vierts al public. Par chest fin, a son stadis individuadis une desene di manifestazions che si davuelzin tes trê provinciis furlanis dilunc dal an. O vin scomençât di Udin, propit cun “Vicino/lontano”».